

Tellurem vasto Mars orbe amplectitur : illum
 Juppiter : hunc pigri plumbea stella patris .
 Quos Venerem , Martemque inter natura locavit ;
 His mirum , si Mars imperet atque Venus ?

De Solis maculis .

E P I G R A M M A .

FAllor ! an æthereas , qui curru ardente per oras
 Æternum puro fundit ab axe jubar ;
 Unde satus Maja , & cum Marte , pigroque parente
 Juppiter ; unde nitet Cynthia , & unde Venus ;
 Unde nitent prata , & radii septemplicis ictu ,
 Versicolorato flore superbit humus .
 Fallor ! an obscura nitidam ferrugine frontem
 Inficit , & maculis turpibus ora notat ?
 Haud fallor : densos ardenti è pectore fumos
 Evomit , & vultus obruit ipse suos .
 Phoebus habet nubes : miseræ miser incola terræ ;
 Tu speras lætos & sine nube dies !

*In Græcam Fabulam Saturni a Jove
 regno pulsi .*

E P I G R A M M A .

TEmporis historiam prisci dum , Græcia , narras ;
 Quæ tibi habenda fides , sat Polus ipse docet .
 En tubus : hic gemino distantia sidera vitro
 Admovet , & filis hic loca certa notat .
 Nonne vides ? Summo propior Saturnus Olympo
 Eminent , inque humili despicit orbe Jovem .
 Ille gravis , lentoque perambulat æthera gressu :
 Hic volat & celeri se rotat usque pede .

O *

Si